

鐵嶺縣志卷十四

宗教志

佛老爭鳴於漢回教蹶興於唐三教並峙然白馬馱經建寺而譯之譯其音語耶譯其經義耶張道陵以道法盛一時其與伯陽道德清淨二經何與回教信徒持齋諷經摩哈默德之教是否如是試聚三教信徒而詳言之恐瞠目蹇舌者比比是也佛教之寂滅道教之清淨回教之果敢皆教外之人作概括之評語今日之天主耶穌與以上三教不同立醫院設學堂以博愛之心踐救世之實其祈禱亦悔過之意本境回教近亦有小學一區不似佛道二教但事募化題緣也此外尚有孔教會大熾於南鄉混元門暢行於東山各處猶有學好在理二事或燒香跪拜或飲茶擺齋不足爲教豈有所宗烏足志我中華民國信教自由載入憲典今之人遂各敬其尊各私其親入主出奴附會剽竊昌黎韓氏之言曰道其所道非吾之所謂道也今爲作一轉語曰道其所道亦非彼之所謂道也自道其道而已矣志宗教

鐵嶺縣志卷十四

宗教

佛教

釋迦牟尼稱如來佛亦曰佛祖其教以虛無寂滅爲宗亦明心見性者也自達摩渡江參悟透澈始爲禪宗第一祖佛教大明厥後不知何時參入死生輪迴天堂地獄諸說雖寓警俗之意佛教之真諦當不如是也本境佛寺皆僧居之僧爲佛氏信徒其是否參悟禪宗乃別一事梁武帝以帝王之尊捨身佛寺者三後人笑其愚焉知其不別有參悟耶按史册可稽者遼金各京府有都僧錄明清有僧錄司其護佛教也至矣鐵嶺自高僧剩上人居龍首山其名大著亦以其道行高上他人不

鐵嶺縣志

卷十四 宗教 佛教

二

鐵嶺縣立第一工科印

道教

寬衣峨冠長髮修髯岸然道貌若不食人間烟火者道士也奉老子爲道教之祖祀斗姥眞武雲房祖師純陽眞人清齋茹素攝心寡言深合清淨無爲之旨本境道人甚少故其教寥落自民國以來風尙剪髮而道人亦偶爲之世人遂莫辨其爲僧爲道喪家延其諷經超度每疑爲僧道雜處盖其派別多彼剪髮者概屬伙居道眞道士不如是也大抵

北關藥王廟爲僧人棲止之所城內圓通寺爲道人棲止之所今不知何時毀圓通寺之舊額改題曰圓通觀又將寺內正殿佛像易其面目衣冠改作羽流千年古刹一但湮沒惜哉

按圓通寺東院廳堂舊供老君故道人棲止焉與寺無涉也考圓通乃禪語宋時有高僧圓通大師與蘇東坡黃魯直晁无咎蔡天啓諸賢友善見米元章西園雅集圖說無罣礙無恐怖光明朗澈之謂圓無人相無我相無衆生相無壽者相四相皆空之謂通道家無此話頭且圓通寺又名白塔寺塔上諸佛歷歷可數其一證也院內明清兩代叢碑林立其碑文但言佛寺並未涉及道家一語其二證也舊縣志曰圓通寺內有老君堂云云其三證也孔子曰有教無類佛道

鐵嶺縣志

卷十四 道教

一

鐵嶺縣立第一工科印

何必不然道人而居僧寺可也乃因其不類已除而去之旣宣賓奪主又湮沒古蹟與打劫又何異哉我佛有捨身之時道家有奪舍之法今易教而道充其義而言之變相之捨身變相之奪舍竟實見於今日矣昔石揆諦暉先後掌教叢林諦暉力戒與石揆爭勝時人高之同教猶能如此今不同教而如彼視諦暉爲何如也界限不除客心未去所無未無不清不淨真求道者當不河漢斯言

回教

摩哈默德之教傳自西域以土耳其爲最盛本境回教來自何時無可考大抵皆亞刺伯及西域人其教長曰阿訇亞刺伯語曰媽日其首領曰回民頭居城內南關不滿百戶城南遼海屯揚威樓城北山頭堡亦有之南關大

街之東清真寺在焉爲禮拜之所旁有小學校一處回漢並收與漢族有同化之意惜其教禁忌甚嚴不食豬肉因其不食豬肉也遂與漢族異以致事事隔閡竟被其教所縛第一不與漢族結婚只以彼教爲限故其教人人無不親戚彼此通呼爲老表第二生計艱難僅小本營生或屠牛屠羊無由發展此皆由不食豬肉與一般人民不同遂錮蔽至此近年彼教中人亦有求學於中學師範頗思自拔奈積習旣深楚咻尤衆不能革故焉能鼎新吾人憫其愚敬其誠無由勸救遼陽縣志載有回籍生員尹三聘撰禮拜寺碑文附錄於後深願彼教讀之而有所領悟焉

附錄尹三聘禮拜寺碑文

鐵嶺縣志

卷十四 宗教 回教

一

鐵嶺縣立第一工科印

新修禮拜寺成入廟思敬羣情熙熙易所言王假有廟聚以正者可以觀其象矣然則即此人心之聚可不懷以法制之嚴乎衆皆伏而聽爰舉雍正七年四月七日聖諭讀之曰直省各處皆有回民居住由來已久旣爲國家之編氓即爲國家之赤子朝廷一視同仁回民中出自文武拜官受爵洊登顯秩者常不乏人讀至此衆皆歡然稽首叩地曰仁之至矣又讀曰回民有禮拜寺初非作奸犯科惑世誣民者比地方官吏不以回民異視而以治衆民者治回民則賞善罰惡之令自無不行讀至此衆益欣然稽首叩地曰義之盡矣又讀曰奉旨禁宰牛隻乃勸民務農勤稼所以重惜力耕之物命聞回民頗有私自屠宰者此即居心殘忍不務本奉法之一端特此詳加訓誨

爾回民當知率由禮義勿恃強凌弱勿倚智欺愚倘謂別爲一教怙惡行私則是冥頑無知甘爲異類憲典具在豈能爲爾寬假讀至此衆乃汗流浹背如怨如慕泫然出涕而不能爲一言於戲觀於此可知化之入人者深而民之歸善者速也吾因之有感矣古者中國之地多華戎雜居其在春秋如楚之陸渾衛之戎州魯之徐戎之類夥矣衆矣而何以不見於秦漢以還秦漢而後如晉之鮮卑魏之拓跋唐之突厥之類亦夥矣衆矣而何以不見於五代以還由是言之必其漸染華俗久而與化抑或當時別有位置如元色目之人告身爲民之類是以道一風同畛域俱泯我回民之入中國已歷數十百年而往代相沿獨自爲教在朝廷聽之固爲覆載之仁在我輩安之實

屬偏私之見方今回教之住各省者衣服文字旣與華同獨飲食一節有所隔闕是以婚姻不通興作難共考之坤輿圖說有曰回回不啖豕故諸國無豕是其始亦祇以口腹嗜好或偶有避忌遂相習成風初非有關名教之重作述之原拘此小忌相爲彼已豈聖天子一視同仁之意乎夫縫掖章甫迹殊宋魯聖人之與時推移也易窮則變變則通通則久我輩生齒日繁而爲教所限與齊民婚姻不通興作不共資生之理日蹙實自蔽之道也其何以久乎易於渙曰渙其羣於革曰革而當鄙占如斯而難以戶說惟望我輩中位致通顯識超凡庸者推千古之通義破陋習之拘墟告之吾相而奏之吾君爲國家畫贊一之治爲回民裕久遠之圖則所以被殊恩蒙寵賚者當

不在尋常意計中也謹誌斯言以俟來者

天主教

清同治初年始來本境西關徐姓張姓首崇奉之城南安心台信者尤多光緒中葉在東關山麓購地建禮拜堂先後入教者二百人光緒二十六年拳匪起燬其堂事定賠款重修規模宏大院內設育英堂施醫院主教者稱司鐸尊之曰神甫土人稱之曰老教蓋指其先於基督教也

基督教

基督教即耶穌教後天主而來鐵嶺清光緒五年有喬姓教士來縣講道傳教以博愛爲宗信者日衆南關鄭姓信徒也施地一區建耶穌教堂清光緒庚子之亂與天主教堂同燬於拳匪後議和賠修而闊大之今有施醫院城東南八十里百貫屯亦有基督教堂信教者尤多